

# Dana RM2 juta latih 500 pekerja IKS

## Bantu 8,000 tenaga kerja sektor itu tingkat kemahiran

KUALA LUMPUR - Kerajaan memperkenalkan satu lagi tabung untuk melatih semula tenaga kerja Malaysia menjadi pekerja berkemahiran tinggi, dan kali ini untuk sektor Industri Kecil dan Sederhana (IKS) dengan dana permulaan sebanyak RM2 juta bagi melatih 500 pekerja.

Menteri Sumber Manusia Datuk Dr S Subramaniam berkata, tabung yang dikenali Tabung Pembangunan Sumber Manusia Untuk Meningkatkan Kemahiran Malaysia itu akan membantu lebih 8,000 tenaga kerja IKS dalam latihan semula dan peningkatan kemahiran yang berterusan.

Bercakap ketika melancarkan tabung itu di sini, Dr Subramaniam berkata, matlamat tabung adalah menyediakan bantuan kewangan dan peluang kepada pekerja yang majikannya berdaftar dengan Perbadanan Sumber Manusia Berhad (PSMB).

"Tujuannya untuk meningkatkan pengetahuan dan kemahiran mereka dalam bidang inovasi, kreativiti dan tambah nilai yang tinggi, dan juga untuk menggalakkan IKS menghantar pekerja mereka mengikuti latihan dalam program bersijil yang akan meningkatkan pendapatan mereka," katanya.

Beliau berkata, matlamat tabung juga adalah selari dengan aspirasi kerajaan untuk membangunkan Malaysia sebagai Ekonomi Berpendapatan Tinggi menerusi pembangunan sumber manusia sebagai penggerak pertumbuhan.

Untuk layak menerima dana, beli-



● Subramaniam (kanan) beramah mesra dengan peserta seminar "Enhancing Competencies to Increase Accessibility to Training for SMEs" di Wisma Perkeso, semalam.

au berkata, pekerja mesti mengikuti program latihan bersijil yang dikeluarkan badan-badan diiktiraf seperti latihan 'Chargeman' oleh Suruhanjaya Tenaga Malaysia, latihan 'Boiler' oleh Jabatan Keselamatan dan Kesihatan, dan latihan teknologi komunikasi dan maklumat (ICT) yang diiktiraf oleh Microsoft, Sun Micro Systems, Oracle, ITIL dan Linux.

"Di bawah skim ini, majikan boleh menuntut balik sehingga 100 peratus bayaran kursus sementara kos-kos lain seperti elavn harian, penginapan dan pengangkutan akan ditanggung oleh majikan yang menyertai," katanya.

Beliau berkata, memandangkan peruntukan tabung itu terhad, satu majikan hanya boleh menghantar seorang pekerja berasaskan kepada

'siapa cepat dia dapat' dengan sasaran 500 pekerja.

"Keberkesanan tabung itu akan dipantau melalui kajian impak dan peruntukan tambahan akan diberi jika ianya memenuhi matlamat," katanya.

Beliau berkata, tahun lepas bantuan kewangan yang diluluskan untuk majikan sektor IKS ialah sebanyak RM73.09 juta melibatkan 122,989 tempat latihan, iaitu 21.46 peratus daripada RM340.65 juta yang diluluskan untuk semua majikan.

Katanya, sebagai respons kepada krisis ekonomi dunia pada 2009, kerajaan telah mengurangkan kadar levi daripada satu peratus kepada 0.5 peratus berkuatkuasa 1 April 2009 sehingga 31 Mac 2011 di bawah Pakej Rangsangan Kedua. - Bernama